

Verbâl de riunion dal Consei Gjenerâl dai 12 di Jugn dal 2025

Clamât adun cun letare dai 22 di Mai dal 2025, joibe ai 12 di Jugn dal 2025 aes cinc e mieze sore sere si à dât dongje in presince tal sît sociâl di Palaç Mantica in Vie Manin 18 a Udin e a distance in modalitât telematiche il Consei Gjenerâl de Societât Filologjiche Furlane, par discuti dal ordin dal di metût ca sot:

1. Leture e aprovazion dal verbâl de volte prime;
2. Comunicazions dal President;
3. Nomine di Socis Benemerits;
4. Ativitâts sociâls e propuestis dai conseîrs;
5. Manifestazions sociâls pai agns a vignî;
6. Variis, se dal câs.

Ae clamade dal President Vicario a rispuindin i Conseîrs: (1)

- *in presince* Carlon, Cinausero, Franco, Frisano, Garzoni, Grossutti, Pelizzo, Ruffini, Sello, Varutti Elio, Venuti, Vidoni; (12)
- *a distance* Bello, Bier, Castellarin, Colussi, Dei Rossi, Di Bortolo Mel, Di Gleria, Fadelli, Finco, Masau Dan, Medeossi, Miotto, Pati, Pavan, Perini, Pettarin, Stel, Tilatti, Tirelli, Tomasella, Tomasi, Vezzi, Zanello, Zanier. (24)

Si son justificâts:

Chiarandini, Contin, Cossar, Lorenzini, Mitri, Navarria, Sclippa, Taverna. (8)

No son:

Aita, Bressan, Brumat, Bulfon, Capellari, Covazzi, Cozzi, Davide, De Marchi, Degano, del Torre, Della Mora, Menegoz, Muzzatti, Papais, Percotto, Portelli, Pugnetti, Puschiasis, Radivo, Salvadori, Varutti Marta, Venier, Visintin, Zanin. (25)

A son presintis ancje lis socis benemeritis Del Fabbro, in presince, Anna Madriz, a distance.

PONT NUMAR 1 DAL O.D.D.:

Leture e aprovazion dal verbâl de volte prime.

Il verbâl de riunion dal Consei Gjenerâl dai 12 di Dicembar dal 2024 al ven fat bon a la unanimitât dai presints.

PONT NUMAR 2 DAL O.D.D.:

Comunicazions dal President.

Il President al inzorne il Consei cun rivuart a:

- la XII edizion de Setemane de Culture, davuelte dai 8 al 18 di Mai;
- lis publicazions buridis fûr e chês daûr a jessi publicadis;

- il ricognossiment di interès culturâl dal Archivi de Filologjiche che à permetût la presentazion e la amission al finanziament dal inventari dal Archivi de Societât e de gnove digjitalizazion dal Font fotografic di Ugo Pellis;
- la donazion di un font di passe 3.600 cartulinis di bande de famee Di Varmo – Mestroni ae Societât.

Il president al ricuarde ancje:

- che il 31 di Lui al scjât il tiermin di consegne dai elaborâts dal Premi Ciceri;
- lis prossimis iniziativis e manifestazions, il Congrès a Bertiûl ai 5 di Otubar, la IX. Edizion dal Colloquium Retoromanistich a Gurize dai 20 ai 22 di Novembar;
- ju intervents pes sedis di Udin, in particolâr par “Palazzo Mantica per Tutti” che al proviôt la costruzion di un ascensôr par l’acès ae biblioteche e ae sale pes cunvignis al prin plan, e pal alestiment dal gnûf imobil di Vie Manin 6/8, tant che depuesit pal patrimoni librari e sale pai cors.

Il Consei al cjape at.

PONT NUMAR 3 DAL O.D.D.:

Nomine di socis benemerits

Daspò de ultime tornade eletorâl cul gnûf consei gjenerâl, l’uffici di Presidence al à pensât di proponi al Consei Gjenerâl la nomine a Socis benemerits di:

- Adriana Janežic;
- Ferruccio Tassin.

Il Consei al fâs buine la propueste ae unanimitât.

Il President al ricuarde che tal mê di Mai al è mancjât Lucio Peressi, soci benemerit colone de nestre Socie par agnorums e al conferme che si varâ di ricuardâlu intun cualchi moment.

Il Consei al fâs buine la propueste ae unanimitât.

PONT NUMAR 4 DAL O.D.D.:

Ativitâts sociâls e propuestis dai conseîrs.

E interven Del Fabbro che e domande plui atenzion pe sede de Cjargne.

Al rispuint il President confermant che in curt si varâ un incuintri cu la presidence de Fondazion dal Museu Gortani sul argoment.

PONT NUMAR 5 DAL O.D.D.:

Manifestazions pai agns a vignî

Il President al ricuarde i apontaments pai prossims agns:

- il CII Congrès Sociâl a Bertiûl tal 2025;
- il CIII Congrès Sociâl a Tavagnâ tal 2026.

Il President al comuniche che e je rivade lacandidature dal comun di Sacîl di ospitâ il Congrès pal 2027.

Il Consei al fâs buine la propueste.

PONT NUMAR 6 DAL O.D.D.:

Variis, se dal câs.

A intervegnin:

- Ruffini che lamente il mancjât coinvoltiment de Societât te Cuarte conference regionâl su la lenghe furlane davuelte a Gurize ai 9 di Jugn, si complimente invezit pal sucès de Setemane de Culture Furlane, ancje se il numar di events in program al è masse grant;
- Garzoni, al ricuarde che il 23 di Jugn a Cjassà al vignarà presentât il documentari “Luigi Garzoni: l’uomo, l’artista, l’intellettuale”;
- Bier e rimarche la mancjance di risultâts de Conference regionâl su la lenghe furlane indulà che no son stâts frontâts i problems e puartadis soluzions, soreddut pal setôr de scuele e de mancjance di insegnants;
- Zanello al è in cunvigne cun Bier su lis criticitâts de Conference regionâl su la lenghe furlane;
- Del Fabbro e rimarche che lis iniziativis de Setemane de Culture Furlane e sedin dome par furlan;
- Dei Rossi al ricuarde la Cunvigne di studis inmaneade de Societât su Bernardino da Bissone ai 19 di Setembar a Tresesin.

Il President al rispuint a ducj ju intervents e al conferme che si varâ di fâ un resonament sul numar di iniziativis e sul ûs de lenghe te Setemane de Culture Furlane.

La riunion si siere aes 19.15.

Il segretari verbalizant

Feliciano Medeot